

## Alles nor Kloonicheite

Om Sunndaach beim Middaachesse hott die Fraa gefroocht: Iwwer was habbder dann heit omm Stommdisch geredd?

Ich habb grad e Kadoffel mett de Zung zerdrickt unn habb desdeweche erst emol mettem Finger uff moi Gosch gezeichnet, bevor ich saache konnt: Och noja, eichentlich nor iwwer Kloonicheite.

Doo sächt se: Ei dann verzähl emol.

Doo habb ich ersdemol geknorrt unn dann zwische Kadoffele, Gemies unn Kotlett e bissi was verzählt:

De erst hadde merrs vom Benzin unn was merr mache kennt, dass merr nit so vill Sprit verbrauche dut. Weils omm Beste wär, merr det gar nimmi mettem Audo in die Rhön fahrn unn det besser ferr drei Daach nooch London flieche, weil dess iss heitzedaach billicher. Unn weil die Hotels in London so deier sinn wärs aach widder billicher, nit dort im Hotel ze iwwernachte, naa, ferr dess Geld kennsde jeden Owend hoom unn om nächsde Moie widder eniwwer flieche. Wenn nor om Fronkforter Fluchhafe dess Parke nit so deier wär, hott de Schorsch ze bedenke gewwe.

Dann hadde merrs von de Streiks bei de Bohn unn aach hier isses so, dassde, saache merr mol du dest die nächst Woch nooch Hamburch wolle, dich lieber ins Fluchzeuch setze dust, doo kimmsde wenichsdens hie unn aach widder zurick, wasde vom ICE heit noch nit saache konnst. Unn außerdem kost dess Flieche dorthie aach nit mehr als de Zuch.

No ja, hott doo die Fraa gemoont, dess konns doch nit soi, dasses Flieche so billich iss, koo Wunner, dass die de Fronkforter Fluchhafe alls weider ausbaue wolle, odder? Doodefoo hadde merrs aach, habb ich gesaacht, weil wenn dess so weider gieht mett dere Bauerei um de Fluchhafe erum, dess heeßt, wenn erstemol dess große Oikaafszentrum grad newedroo unn de Iwwerbau vom Bohnhof ferrdich sinn, dassde gar nimmi mettem Audo von Wissbade unn Meenz zum Schopping on de Fluchhafe fährst, weil des so deier iss unn weilde nor im Stau stehe dust, dassde doodeferr in Erwenemm ...

Wo?, hott die Fraa gefroocht.

Ich saach: ... in Erbenheim in enn A 380 oisteie unn in Fronkfort aussteie dust, unn wennde mettem Oikaafe ferdich bist, werrsdde mettem selwe Fluchzeuch widder nooch Erwenemm zurickgebracht. Dess kimmt so, hott de Karl gesaacht, dess kimmt so, glaabt merrs, dess kimmt so wies Amen in de Kerch.

Deletzt hadde merrs dann von de EU unn dass die dort in Brüssel nor noch Woi aus Trauwe als Woi bezeichne losse wolde, also dasses in Zukunft koon „Apfelwein“ mehr hätt gewwe derfe. Dess iss joo jetz vom Disch, awwer trotzdem hawwe de Karl unn ich uns iwwer so enn Bleedsinn uffgereecht, nor de Schorsch iss gonz ruhisch gebliwwe. Ich habben gestumpt unn gesaacht: Schorsch, saach du doch aach emol was zu dere Sach.

De Schorsch hott nor mette Achsele gezuckt, hott soi gerippt Glas hochgehawwe unn gesaacht: Dess intressiert mich nit, weil so e Zeich wie Apfelwein trink ich nit, ich bleib beim Äbbelwoi. Prost!

Dess alles habb ich de Fraa erzählt unn zum Schluss gesaacht: Siehsde, ess warn alles nor Kloonicheite. Hosde noch was zum Noochdich? Eiern Honnes